

ՄԵՄՂԱ. ԵՎԱԳԱՐԱՆ ԵՎ ՄՈԳԱԿԱՆ ԳՈՐՄԻՓ

Հ. Վ. ՊԻԿԻՉՅԱՆ

Հայաստանում տարածված հնադուրյն աղմկային-հարվածային նվագա-
քաններին ընտանիքին է պատկանում ծնծղան, որն իր տարատեսակներով
կենցաղավարել է պատմական Հայաստանի գրեթե բոլոր ազգագրական գո-
տիներում: Բացի երաժշտագիտության մեջ ընդունված իր բուն՝ մեղեդու-
ովի միակ պատկերն ընդգծող նշանակությունից, ծնծղան ձեռք է բերել ալի-
ալլ ինքնատիպ դեր և նշանակություն, որն էլ ի մի ներկայացնելու էթնո-
երաժշտագիտական փորձ է սույն հետազոտությունը:

Մասնագիտական գրականության մեջ հիշատակված ծնծղաների նկա-
րագրություններից բերենք Մ. Օրմանյանի համեմատաբար ամբողջական
գրառումը, ըստ որի ծնծղան է «...պղնձե ձայնական գործիք, տափակ ու
կլոր, իբր 40 հարյուրամետր տրամագծով, մեջտեղը գոգավորված, որուն
ետեմն կաշին օղակով կրունկի, և երկու ծնծղա երկու ձեռքով իրարու բա-
խելով սաստիկ ու դղրդացնող ձայն կհանե, որ իրավամբ գրոց մեջ ալ զո-
ղանջել կոչված է: Ծնծղաներն ի հնուց անտի ծանոթ են, նույնիսկ արտաքին
նվագախումբերու մեջ ալ ընդունված են: Ծնծղաներուն բոլոր առավելու-
թյունը պղնձին այնպիսի խառնուրդ տալու մեջ է, որ սպասված ձայնը
տա՝: Հեղինակը տարբերակում է նաև նվագարանի մի ալլ տարատեսակ.
«Ծնծղակ՝ փոքր, պղնձե գործիք, կիսագունդ զանգակի ձևով և վրայի կող-
մեն բռնելու կոթով մը, որ պղնձե թաթով դուրսի կողմեն կբախվի և ձայ-
ները ճշգրիտ և կանոնավորելու կծառայի: Ռամկորեն զիլ անունով ճան-
չըցված է, և մեր եկեղեցիներուն մեջ տարածված կիրառություն ունի: Իսկ
«Բառարան Սուրբ գրոց»-ում կարդում ենք. «Ծնծղա, երաժշտական գործի,
կաղմալ երկու պղնձի տախտակներե, զոր զարնվելով ընդ իրարս, կհանեն
թրթռակ և սուր ձայն: Սաղմոսեն ՃԾ. 5. կտեսնվի, թե կար ձեռաց և մա-
տանց ծնծղա: Ծնծղայք կգործածվեն ի տաճարին և հասարակաց զվար-
ճությունց մեջ... ինչպես սովորություն է զարդիս առ Հայս»¹:

Գրականության տվյալների², Հայաստանի պատմության և ազգագրու-
թյան թանգարանների հավաքածուների³, ինչպես նաև Հայաստանի տարբեր
շրջաններում գիտարշավների ժամանակ մեր գրանցած նյութերի հիման վրա
ծնծղաներն ըստ ձևի տիպաբանելիս կարելի է տարբերակել երեք հիմնական
խումբ՝ հարթ, կիսագնդաձև և գմբեթաձև, որոնք ընտ շափի լինում են մեծ,
միջին և փոքր: Ծնծղաները հնչում են առանձին կամ զույգով: Առանձին

1 Մ. Օրմանյան. Միսական բառարան. Անթիլիաս-Լիբանոն, 1957, էջ 143:

2 Նույն տեղում:

3 Բառարան սուրբ գրոց. Կ. Պոլիս, 1881, էջ 255:

4 К. А. Вертков, Г. Благодатов, Э. Язовицкая. Атлас музыкальных инструментов народов СССР, М., 1963; Музыкальная Энциклопедия. М., 1981; Музыкальный Энциклопедический словарь, М., 1990; А. К. Кочарян. Ударные и дуды ховы народные музыкальные инструменты в Армении. Ереван, 1965 (автореферат).

5 Տե՛ս Հայաստանի պատմության պետական թանգարանի (այսուհետև՝ ՀԱՊԹ), № 2742, 2739, 2738, 2747, 2740, 2745, 2737, 2744, 2735, 2736, 2743, 2741, 2734, 2660, 2663, 2746, 2650—2652, 2654, 2655—2659, 4254, 4255, 9294, 9430 նվագարանները, ինչպես նաև Հայաստանի ազգագրության պետ. թանգարանի (այսուհետև՝ ՀԱՊԹ), № 1160—1162, 1352, 3264/2, 3264/3, 3264/6. ա. բ., 4259/2 նմուշները:

(միակ) ծնծղաները նվազում են թաթով, ձողիկով կամ ճիպոտով: Մ. Օրմանյանի վերոհիշյալ աշխատության մեջ թաթը ներկայացվում է որպես «...բախելու գործիք մը՝ որ կգործածվի երգեհոնեն, զանգակեն ու ծնծղայեն ձայն հանելու համար: Թաթը ձեռքի վրայ գործածվելիք և զարնելու համար՝ քիչ ու շատ մուրճի նման գործիք մըն է»⁶: Ձողիկը՝ մետաղյա, իսկ ճիպոտը՝ փայտե երկարավուն, զլանաձև հարմարանքներ են, որոնք կիրառվել են նույն նպատակներով: Զույգ ծնծղաները հնչեցնում են միմյանց հարվածելով:

Իսկ այժմ անդրադառնանք ծնծղաների տիպաբանությանը.

Հարթ ծնծղաներն են՝

ա) Մեծ (միակ), որը ժողովրդախոսակցական լեզվում կոչվում է նուռարև, դամ, երդեհոն, ցնձա, ցընձղա, ցըմցըմ: Տրամագիծը՝ 30—50 սմ (տե՛ս ՀՊՊԹ, № 2747, 2746, 9430 և 9294 նվագարանները):

բ) Մեծ (զույգ), փոքր-ինչ ուռուցիկ գլխիկով: Կոչվում են նաև ցըմպապա, երգեհոն, ցընձղա, ցնձա: Տրամ.՝ 30—47 սմ, գլխիկի բարձրութ.՝ 3—5 սմ:

գ) Միջին չափսի (միակ և զույգ), փոքր-ինչ ուռուցիկ գլխիկով՝ ցընցըս, երգեհոն, ծնծաղ, ցընձըղներ: Տրամ.՝ 17—30 սմ., գլխիկի բարձրութ.՝ 1,5—3 սմ (տե՛ս ՀՊՊԹ, № 2735—2745 նվագարանները):

դ) Փոքր չափսի (միակ և զույգ), փոքր-ինչ ուռուցիկ գլխիկով, որի վրա մատներին հաջցվող կաշեփոկեր կան: Հայտնի են նաև որպես մատների ծնծղա, զիլ, զիլփարա, չալփարա, ծընգծընգիկ: Տրամ.՝ 5—15 սմ, գլխիկի բարձրութ.՝ 0,5—1 սմ (տե՛ս ՀՊՊԹ, № 3264/2, 3264/3):

ե) Կենաց ծառի տեսքով բռնակավոր ծնծղա, ճյուղերին հինգ զույգ զիլեր, բռնակները հիմքի մասում միացած են կամ կազմում են երկու առանձին մաս, նվագում են և՛ միմյանց հարվածելով, և՛ թափահարելով: Անվանվում են նաև զիլի մաշա, ունելի, ցնցելի, ծնծղուկք: Ծնծղաներից յուրաքանչյուրի տրամ.՝ 5—7 սմ, գլխիկի բարձրութ.՝ 0,5 սմ, ծառի ընդհանուր բարձրութ.՝ 25—43 սմ (տե՛ս ՀՊՊԹ, № 3264/6, 1353, 4259):

զ) Բռնակավոր ծնծղա, փայտե ձվաձև կամ ուղղանկյունաձև շրջանակի կենտրոնում ամրացված ձողիկին զույգերով շարված զիլերով, նվագում են թափահարելով: Կոչվում է նաև ունելի, մաշա, ցնցելի, ցընցըլա, շըխլըրդիկ, շըխլըրդաճ, ձիւծղուկք: Զիլերից յուրաքանչյուրի տրամ.՝ 3—7 սմ, գլխիկի բարձրութ.՝ 0,5 սմ, ընդհանուր բարձրութ.՝ 17—25 սմ (տե՛ս ՀՊՊԹ, № 3264/1):

Կիսագնդաձև ծնծղաներն են՝

ա) Փոքր չափսի (միակ և զույգ), գազաթին կաշեփոկի համար բացված անցքով: Հայտնի են նաև որպես երգեհոն⁷, աղջիկ⁸, ծնծղակ, ծնծղուկ, ծնծըզիկ, ծիծեռնակ: Տրամ.՝ 7—12 սմ, բարձրութ.՝ 3—6 սմ (տե՛ս ՀՊՊԹ, № 2650, 2651, 2652, 2654—2659, 2661, 4254):

բ) Բռնակավոր (միակ և զույգ), փոքր-ինչ երկարավուն, սրածայր բրդնակով: Անվանում են նաև՝ երգեհոն, մանչ⁹, ծնծղակ, ցընձղակ, ձընձղակ:

⁶ Մ. Օրմանյան. նշվ. աշխ., էջ 121:

⁷ Ինչպես արդեն նկատելի է, Հայաստանում ծնծղաներին շատ հաճախ անվանում են նաև երգեհոն:

⁸ Ծնծղայի այս անվանումը պայմանավորվում է նվագարանի գլխիկին կամ բռնակի ծայրին արված շրջանաձև անցքով:

⁹ Անվանումը կապվում է ծնծղայի բռնակի ձևի հետ: Մանչ և աղջիկ տիպի ծնծղաները մեծ տարածում ունեն մոզական արարողությունների ժամանակ, որոնց ավելի մանրամասն կանդաղառնանք ստորև:

Տրամ.՝ 8—12 սմ, բարձրութ.՝ 5—6,5 սմ, ընդհանուր բարձրութ.՝ 15—18 սմ:

գ) Բռնակավոր (միակ և զույգ), երկար, շրջանաձև ծայրով մետաղե բռնակով: Կոչվում է նաև երգեհոն, աղջիկ, ծնծղուկ, ծիծեռնակ, ծրնգըլիկ: Տրամ.՝ 11—13 սմ, բարձրութ.՝ 5—7 սմ, ընդհանուր բարձրութ.՝ 18—20 սմ (տե՛ս ՀՊՊԹ, № 2660, 2663):

ԿՄՐԼԲԱՆ ԾՆԾՊԱՆԵՐՆ ԵՆ՝

ա) Փոքր-ինչ երկարավուն, որպես բռնակ ծառայող գմբեթաձև գլխիկով, որը պտուտակով ամրանում է զանգակաձև իրանին: Գլխիկն ավարտվում է փոքրիկ, հարթ, կաշեփոկի համար անցք արած ելուստով: Կոչվում են նաև երգեհոն, մանչ, մղղսու զանգ, ձրնձրրղա (միակ): Տրամ.՝ 8—9 սմ, բարձրութ.՝ 9—10 սմ (տե՛ս ՀՊՊԹ, № 2734):

բ) Զանգակաձև, իրանի գագաթը կենտրոնում աստիճանաբար դեպի վեր ձգվելով նմանվում է կոնաձև գմբեթի, որի վրա կաշեփոկի համար բացված անցք կա: Անվանում են նաև երգեհոն, մանչ, մղղսու զանգ, ծնծաղ (միակ): Տրամ.՝ 8—9 սմ, բարձրութ.՝ 5—6 սմ (տե՛ս ՀՊՊԹ, № 6120):

Բացի վերոհիշյալ տարբերակներից, ծնծղաները հաճախ հանդիպում են նաև այլ հարվածային նվագարանների հետ համակցված: Դրանք են.

ա) Մեծղայավոր դափ (նվագարանի փայտյա շրջանակին զույգերով ամրացված զիբերով): Նվագում են հարվածելով կամ թափահարելով: Հայտնի է նաև որպես գափ, դաֆ, դեֆ, ծաղրածուի դափ, թափառաշրջիկի դափ, բոշի դաֆ, մայմունի դաֆ: Զիբերից յուրաքանչյուրի տրամ.՝ 3—7 սմ, դափի տրամ.՝ 23,5—25 սմ, բարձրութ.՝ 5 սմ (տե՛ս ՀՊՊԹ, № 2518/3):

բ) Մեծղայավոր թմբուկ (մեծ թմբուկի գագաթին ամրացված մեծ, հարթ, կամ միջին չափսի զույգ, կամ միակ ծնծղայով): Կոչվում են նաև դրմփազ, թրմբադ, ծրմփազ: Մեծղայի տրամ.՝ 20—40 սմ, թմբուկի տրամ.՝ 54 սմ, բարձրութ.՝ 34 սմ:

Ըստ ձայնի արտաբերման եղանակի կարելի է տարբերակել հարվածի, թափահարման, միմյանց քսելու միջոցով հնչող ծնծղաներ, որոնք հանդիպում են կոնկրետ լարվածքով և չարված՝ աղմկող և հնչուն ծնծղաներ: Հարկ է նշել նաև, որ ծնծղայի ձայնի արտաբերման եղանակը հաճախ կախված է կատարվող ստեղծագործությունից, նվագողի նախասիրությունից ու վարպետությունից, քանի որ նույն ծնծղան կարելի է տարբեր կերպ հնչեցնել: Օրինակ, հարթ, զույգ ծնծղաները կարելի է և՛ հարվածել, և՛ միմյանց քսելով հնչեցնել, կենաց ծառ հիշեցնողները՝ հարվածելով ու թափահարելով, իսկ մետաղե բռնակով գմբեթաձևները՝ միայն հարվածի միջոցով, քանի որ նրա համեմատաբար ծանր, ձուլածո իրանը քսելիս չի հնչում, իսկ մետաղե միատարր բռնակն արգելում է թափահարելու հնարավորությունը:

Ըստ պատրաստման տեխնիկայի ծնծղաները լինում են երեք տիպի.

ա) Զուլածո՝ ինչպես կիսագնդաձև ու գմբեթաձև (մանչ ու աղջիկ) ծրնծղաները, որոնք պատրաստվում են համապատասխան կաղապարներով.

բ) Կոփածո կամ ծեծած՝ կենտ ու զույգ հարթ ծնծղաները, որոնք պատրաստվում են մեկ ամբողջական կտոր պղինձը կամ բրոնզի շիկացած համաձուլվածքը ծեծելով և աստիճանաբար նվազարանի տեսք տալով¹⁰.

գ) Առանձին մետաղալարերը փաթաթում են, ծնծղայի ձև տալիս, ապա

¹⁰ Հարկ է նշել, որ շիկացած, կրակով սրբազորված մետաղը և դարբինը՝ այսանդ ծնծղայագործ, դիցաբանություն մեջ ուղղակիորեն առնչվում են երկնային ուժերին՝ արևին, կայծակին ու ամպրոպին և դառնում դիցաբանական կերպարներ, իսկ այս եղանակով պատրաստվող ծնծղաները ժողովրդի մեջ ընդունված է անվանել աբե կամ նվագարանը նկարագրելիս այն անմիջապես համեմատում են արևի հետ: Նվագարանի մոգական-դիցաբանական հատկանիշներին կանգրադառնանք ստորև:

մշակում որոշակի ջերմաստիճանում: Այս եղանակով պատրաստված ծրնծղայի ղողանջն ավելի հնչեղ ու երկարատև է լինում: Նվագարանի պատրաստման պուլն եղանակը մինչև օրս էլ կիրառվում է Թուրքիայում և ԱՄՆ-ում՝ հանրահայտ «Ավետիս Զիլճյան» ֆիրմայի կողմից: Ի դեպ նշենք, որ XIX դարի կեսերից սկսած, Արևմտյան Հայաստանում (Սամաթիա) Քերովքե Զիլճյանից սերնդե-սերունդ փոխանցվեց ծնծղաների համաձուլվածքի ու ձուլման ջերմաստիճանի գաղտնիքը, և արդեն շուրջ երկու հարյուր տարի, նրանց պատրաստած նվագարանները համարվում են աշխարհում լավագույններն ու բազմիցս մրցանակների արժանանում համաշխարհային ցուցահանդեսներում¹¹: Մասնագիտական գրականության մեջ դրանք հայտնի են որպես *piatti*, *cinelli* (իտալ.), *Becken* (գերմ.), *cymbals* (անգլ.), *cymbales* (ֆրանս.), *κυμαλον* (հուն.), *тарелки* (ռուս.)¹²:

Ծնծղաների պատրաստման հումքը ևս տարբեր երկրներում ու ժամանակներում տարբեր է եղել. քար, փայտ, ընկույզի կեղևներ, ոսկր, պղինձ, բրոնզ, արծաթ, ոսկի, մետաղի համաձուլվածք: Հայկական լեռնաշխարհի տարածքից հայտնաբերված զուլյգ, հնագույն բրոնզե ծնծղաները, որ գտնվել են Կարմիր Բլուրի պեղումներից, թվագրվում են մ. թ. ա. VII դարով¹³:

Հայոց առաջին ձեռագիր մատյանից մինչև օրս, դրական և ժողովրդախոսակցական լեզուներում օգտագործվում է ծնծղաների տարբեր տիպերի ու տեսակների շուրջ երկու տասնյակ անվանում¹⁴, որոնք հիմնված են նվագարանի երեք հիմնական հատկանիշների վրա.

ա) Ձայնի արտաբերման՝ ցրնցելի, ցրնձղակ, ձրնձըրղա, ցնցել բայի բառային ձևերից¹⁵,

բ) Հնչողության՝ զիլ, ցրմցըմ, ցրմպապա, ծրնծղիկ, ծրնգծրնգիկ, ծնգլիկ, ծրնծղուկ, ծնծղա, ցրնցղա, ցրնձղա¹⁶.

¹¹ Տե՛ս Հայ ժողովրդի պատմություն. հ. 5, Երևան, 1974, էջ 645:

¹² Музыкальная Энциклопедия, т. 5, М., 1981, с. 442. Մասնագիտացված նվագարաններում ծնծղաների տարբեր տիպերի կառուցվածքի ու կիրառման մասին տե՛ս А. Н. Папанов. Ударные инструменты в современных оркестрах. М., 1973, с. 70—80.

¹³ Է. Խանզադյան. Հայկական հին երաժշտական գործիքները.— Հայաստանի պատմության պետական թանգարանի աշխատություններ. հ. 5, Երևան, 1959, էջ 64:

«Ծնծղաներից մեկը համարյա ամբողջական է, միայն եզրն ու բռնակի տեղն է մի կիթեր մաշված: Այն բաղկացած է երեք մասից՝ շրջանաձև սկավառակից, միջին մասում կիսազնդաձև զմբեթից և բռնակից: Բռնակն ամրացված է զմբեթի գագաթին: Հարթ մասի շառավիղը 4,5 սմ է, տրամագիծը 9 սմ, ամբողջ ծնծղայի տրամագիծը 18 սմ է: Երկրորդ ծնծղան, որ գտնվել է առաջինի հետ միասին, նույն չափերն ունի և առաջինի զուլգն է կազմում, բայց շատ խիստ քայքայված է, պահպանվել է միայն քառորդ մասը»:

¹⁴ Տե՛ս Հ. Աճառյան. Հայերեն արմատական բառարան. հ. 2, Երևան, 1973, էջ 465: Նոր բառգիրք Հայկազեան լեզուի. հ. Ա, Երևան, 1979, էջ 1020: Հ. Աճառյան. Փննություն Վանի բարձրագույն. Երևան, 1952, էջ 268: Հ. Աճառյան. Փննություն Առտիայի բարձրագույն. Երևան, 1953, էջ 271: Ռ. Բազրամյան. Դերսիմի բարբառային քարտեզը. Երևան, 1960, էջ 85: Գ. Շերենց. Վանա սաղ. Թիֆլիս, 1885, էջ 175: Տ. Մկուռնդ. Ամիտայի արձագանքներ. Նյու Յորք, 1950, էջ 447: Մ. Օրմանյան. Նշվ. աշխ., էջ 121, 143: Բառարան սուրբ գրոց, էջ 177, 255: Մատենադարանում պահվող ձեռագրերում ծնծղաների պատկերների մասին տե՛ս Ա. Գրիգորյան. Արհեստներն ու կենցաղը հայկական մանրանկարներում. Երևան, 1973, տախտակ LXIII, ձեռ. № 4778, զուլգ հարթ, փոքր ծնծղա, Արճեշ, 1462 թ. Ավետարան, ծաղկող՝ Կարապետ, տախտակ XVII, ձեռ. № 4883, ծնծղալավոր գափ, Կուուց անապատ, 1462 թ., Հայսմապուրք, ծաղկող՝ Մինաս:

¹⁵ Ըստ Հայկազեան բառարանի, ծնծղայի հունական անվանումը ևս առաջացել է ցնցել բայից՝ կիմվալուն (հ. Ա, էջ 1020):

¹⁶ Ըստ Աճառյանի, ծնծղայի արաբական, ասորական և եբրայական անվանումների հիմքը եբրայերեն հնչել բայն է՝ *Sall*, այստեղից էլ՝ ցելցելիմ, ծելծելիմ, շալշալիմ անունները (Արմատական բառարան, հ. 2, էջ 465):

գ) նվագարանի կառուցվածքի՝ ունելի, մաշա, զիլի մաշա, մանչ, աղջիկ, Վերջին տարիներին, հազվադեպ, կիրառվում է նաև ափսե անվանումը, որն ուղղակիորեն ուսուցիչների тарелки ձևի թարգմանությունն է և օգտագործվում է ուսուցական կրթություն ունեցողների շրջանում:

Դեռևս գրավոր աղբյուրներից հայտնի է, որ ծնծղաները թե՛ աշխարհիկ, թե՛ հոգևոր տոների, ծեսերի ու արարողությունների ժամանակ կիրառվել են իբրև «ցնծուկ»-ի նշանակալի¹⁷, սակայն սա նվագարանի բազմաբնույթ կիրառության միայն մի կողմն է: Փորձենք դիտարկել ծնծղան ըստ ազգագրական նյութերի:

1. Ռազմի դաշտում և որսի ժամանակ ծնծղաների (մեծ, հարթ) արձակած հզոր ձայնն ու աղմուկը խուճապի է մատնել թշնամուն ու զազաններին: Ուշագրավ է, որ հակառակորդի զորքը հանկարծակիի գալով, այդ աղմուկը համեմատել է դժոխքի ու սատանաների հետ (դժոխային ժխոր, սատանայական խրախճանք) և լեղապատառ փախել: Հիշյալ դեպքում օգտագործվել են շարված, հարթ, մեծ ծնծղաններ՝ թմբուկների, մեծ զուռնաների ու փողերի (մետաղե, փայտե) հետ¹⁸:

2. Տոնական ու ծիսական պարերի ժամանակ մատներն փոքր ծնծղաների հնչյուններն ընդգծել են երաժշտության ութմիկ պատկերն ու միաժամանակ ունեցել չարխափան նշանակություն¹⁹: Մեր օրերում այս ծնծղաներին երբեմն փոխարինում են բուլթի և միջամատի շփումից առաջացող հարվածներն ու այդ երկու մատներին հազցվող ապակե կամ մետաղե փոքրիկ բաժակները²⁰:

3. Եկեղեցական երաժշտության մեջ, հատկապես հոգևոր երգեցողության ժամանակ, միջին և փոքր չափսերի զանգակաձև ծնծղանները յուրօրինակ կամերտոնի դեր են կատարել²¹:

4. Թեև եկեղեցական կարգում ծնծղան, քշոցը կամ զանգը խորհուրդ չունեն և չեն օժվում, այլ եկեղեցում օգտագործվող ու նվեր տրվող բոլոր առարկաների նման միայն օրհնվում են, ժողովուրդը եկեղեցական ողջ սպասքի, զանգերի, քշոցների հետ միասին, սրբացրել է ծնծղանները ևս ու համարել եկեղեցուն մատուցված ամենահարգի ու արժեքավոր նվերներին, որի մասին վկայում են նաև նվագարանների արձանագրություններն ու բանասացների վկայությունները²²: Եվ բոլորովին էլ պատահական չէ, որ եկեղեցուն ծնծղա, քշոց, զանգ նվիրելը նպատակին հասնելու, բուժման ակնկալությամբ արված զոհաբերության՝ մատաղի ձևերից մեկն է համարվել, այն տարբերությամբ, որ չար գործ կատարած մարդիկ (քրիստոնեական պատվիրաններն անարգողները) չէին կարող առանց մեղքը քավելու նը-

17 «Ծնծղայի կիրառությունն ընդհանուր է մեր եկեղեցվո մեջ, ոչ թե լուկ իբր երգեցողության ու ձայնի կանոնավորության նպաստող գործիք մը, այլ և իբր ցնծության նշանակ, ուստի լուր օրեր ծնծղա չի լսվիր, և տոնախմբության մեջ կհնչեն, և այնչափ ավելի, որչափ տոնախմբությունը մեծ է...» (Մ. Օրմանյան. Նշվ. աշխ., ծնծղա):

18 Հ. Պիկիչյան. Դաշտային ազգագրական նյութեր (այսուհետև՝ ԴԱՆ), Նոր Նախիչևան 1982, Շիրակ 1982, Զավախք 1985:

19 ԴԱՆ, Երևան 1980 (հայրենադարձներից), այս մասին համեմատական նյութեր կան Ս. Ս. Լիսիցյանի «Старинные пляски и театральные представления армянского народа» (Ереван, 1958, т. 1. с. 140) աշխատությունում:

20 ԴԱՆ, Երևան 1980 (հայրենադարձներից), Շիրակ 1982:

21 Մ. Օրմանյան. Նշվ. աշխ., (ծնծղա):

22 ԴԱՆ, Ուտիք 1985, Երևան 1980. տե՛ս Հայաստանի պատմության պետական թանգարանի ֆոնդերում պահվող №№ 2650, 2652, 2659, 2663, 2734, 2735, 2736, 2737, 2741, 2743, 2746, 4255, 4254, 9294 ծնծղանները: Մեծղան հեղինակության, հարստության, հասարակության մեջ գրաված բարձր դիրքի նշան է համարվել նաև Արևելքի այլ ժողովուրդների մոտ, որի մասին ավելի մանրամասն տե՛ս Դ. Գ. Տրատանով. Народные верования населения Индокитая, М., 1978, с. 192.

ման զոհաբերություն անել, քանզի այն անընդունելի ու պիղծ էր համարվում: Եկեղեցուն ծնծղա նվիրելու ամենատարածված ու ընդունելի միջոցը մահտեսի լինելն էր, այսինքն՝ Երուսաղեմ ուխտ գնալուց հետո²³: Նույն վկայությամբ, ծնծղաները եկեղեցուն նվիրում էին թի հիշատակ, թի բարեխոսություն, թի քավություն մեղաց» և թի փրկություն հոգվոք: Այս առումով դրանք ուղղակիորեն համեմատելի են խաչքարերի հետ: Սակայն եկեղեցուց դուրս, ժողովրդական կենցաղում, հավատալիքներում, մոգական, հմայական, կախարդական արարողություններում հատկապես ընդգծվել է ծնծղայի շարխափան ուժն ու նշանակությունը և նվազարանի տարբեր տեսակներին ու նրանց արձակած ձայնին վերադրվել են տարբեր հատկություններ:

Ա. Մոգություն ձայնի միջոցով.

ա) Մեծղայի ձայնին վերագրվում է խավարը վանելու հատկությունը. ըստ ժողովրդական պատկերացումների թխավարումը կառաջանա շար վիշապի պատճառով, որ կուզե կուլ տալ արեգակը, խավարման ժամանակ հրացան կարձակեն և ծնծղաներ վզարկեն՝ շար վիշապը փախցնելու համար²⁴: Գ. Սրվանձոյանցը գրում է. «Կան տեղաց տեղաց բնակիչք, որք հրացաններով ու դղրդոցներով կ'փախցունեն մեր լուսոյ դեմը բռնողներն. ոմանք ևս ջերմեռանդ և ողորջավոր ձայնիվ Տեր ողորմեա կըսեն, պղնձե ափաններ և ծնծղաներ հնչեցնելով: Աստված կկանչեն, որպեսզի խավարման շար հետևանքներեն, ղոր կգուշակեն, ազառե զիրենք: Այս սովորությունը, ինչպես նաև մեկալ բաներն ալ միայն Վանա մեջ չեն, այլ շատ գավառներու մեջ կտեսնվին. մինչև՝ թիֆլիզ ևս ասկե 12 տարի առաջ տեսանք...»²⁵:

բ) Չար ուժերը քշելու հատկություն. Զավախքում պահպանված սովորության համաձայն, եկեղեցուց դուրս գալիս նորապսակներին ուղեկցում են Ծնծղայի հնչյուններով²⁶, որպեսզի շարերը հեռու մնան, չմոտենան և փախչեն:

գ) Նյարդային հիվանդությունները բուժելու հատկություն. այս նպատակով ժողովրդական բժիշկները հանձնարարում են երկու տարբերակ.

1) Նյարդային հիվանդին պարացնում են ծնծղաների (փոքր, մատների զիլեր) ութմիկ ղողանջի տակ, որը հանգստացնում է նյարդային համակարգը²⁷:

2) Ծնծղաներով աղմուկ են հանում, որ հիվանդի որովայնում թաքնված դևը կարծի, թե յուրայիններն են եկել խրախճանքի ու դուրս գա²⁸: Այս իրավիճակում առաջացած ուժեղ աղմուկից նյարդային հիվանդն աստիճանաբար շոկի մեջ է ընկնում, արագանում է շնչառությունը, ապա միանգամից լից-

23 ԴԱՆ, Երևան, Ուտիք, Զավախք, Երևակ, Երուսաղեմ ուխտ գնացողները սովորաբար այնտեղից որեւէ ընծա էին բերում իրենց եկեղեցուն, որպես հիշատակ, կամ գալուց հետո սեփական ձեռքով նվեր պատրաստում կամ պատվիրում:

24 Բ Ե Ն Ս Ե. Բուլանըլի կամ Հարք գավառ.—Ազգագրական հանգես (այսուհետեւ՝ ԱՀ), դիրք 2, Թիֆլիս, 1900, էջ 31: Արեկի կամ լուանի խավարման ժամանակ ծնծղաներ հնչեցնելու սովորության մասին տե՛ս Գ. Սրվանձոյանց. Մանանա. Կ. Պոլիս, 1876, էջ 113:

25 Ե. Լալայան. Զավախք.—ԱՀ, դիրք Ա, Եուզի, 1895, էջ 253: «Հարսանյաց ավանդական ծեսի ընթացքում առանձնահատուկ նշանակություն էին տալիս ծնծղայի օգտագործման երևույթին (մղզսու դանդ)՝ Փերիթյում և Զհարմհալում: Մեծղայով, ձեռքի զանգի քաղցր ղողանջներով նվազակցել են հարսանիքներին, եկեղեցուց դուրս գալուց առաջ, «Արեգակն արդարություն» շարականին զուգընթաց և մկրտած մանկանը տուն տանելիս, դարձյալ համփին»,— գրում է բանահավաք Մատուր Զարգարյանը «Հայ ժողովրդական նվագարաններն Իրանահայքում» անտիպ հոդվածում, հեղինակի անձնական արխիվ, էջ 8:

26 ԴԱՆ, Զավախք 1982, Ուտիք 1985:

27 Նույն տեղում:

28 Նույն տեղում:

քաթափվում է ու հանգստանում (հմմտ. Ղուռնա-դհոլի նվագով հիվանդին բուժելու հետ)²⁹:

դ) Մենդաբեթությունը թեթևացնելու նպատակով ևս կիրառվում է երկու տարբերակ.

1) Մատների ծնծղաների մեղմ ձայնով հրապուրում են նորածնին, որը, հրեշտակների դասին պատկանելով, արագորեն դուրս է գալիս յուրայիններին միանալու³⁰ (հմմտ. մեծ ծնծղաներին վերագրվող սատանայական հատկությունների ու ձայների հետ):

2) Հստ ժողովրդական պատկերացումների, յուրաքանչյուր ծնծղաբերության ժամանակ ծնծղականի ուսերի մոտ կանգնած են հրեշտակն ու սատանան (համապատասխանաբար աջ ու ձախ կողմերում) և երբ սատանան ուղում է խել նորածնին՝ խեղդելու, սպանելու նպատակով, ծնծղաբերությունը դժվարանում է: Սակայն ծնծղականի վիճակը կարելի է թեթևացնել մեծ ծնծղայի ուժգին հարվածներից առաջացած ձայնի միջոցով³¹:

ե) Հոգևոր ծիսակարգում ծնծղան հատկապես օգտագործում են տոնների և ծիսական արարողությունների ժամանակ, ինչպես Մաղկազարդի կիրակի երեկոյան, Դոնբացքի ծեսին՝ Մեծ պասի ընթացքում, երբ ժամերգությունում արտասանվում են «Բա՛ց, մեր դուռը ողորմութեան...» խոսքերը և երեք անգամ խփում ծնծղաները, որից հետո միայն բացվում է վարագույրը (հմմտ. դուռը բացելիս շար ուժերին վանող մոգական հատկությունների, ինչպես նաև հինդուսական տաճարներում ընդունված ձայնով, գոնգով, զանգով կամ ծափով Տիրոջ ուշադրությունը հրավիրելու սովորության հետ): Ծնծղա էին դարկում նաև նույն տոնի առավոտյան ժամերգության ժամանակ³²:

Սրբուհի կիսիցյանը նշում է, որ հոգևոր արարողությունների ընթացքում որոշակի շարականներ կատարելիս օգտագործում են մեծ, կրկնակ ծնծղաներ, որոնք ունենում են չնչնում են մեկ կամ երկու տիրացու, ինչպես նաև միակ մեծ ծնծղա (տրամ.՝ 40 սմ), որը նվագում են ծայրին կտոր փաթաթած 30 սմ երկարությամբ կաղնեփայտե ճիպոտով: Այսպիսի ծնծղաները պատրաստվում էին արծաթի համաձուլվածքից: Հստ բանասաց Ապել Նազիկյանի, Փոքր Հայքում այն կոչվում էր երգեհոն: Հստ Արշակ Բաբայանի Հայոց Ձորում (Վասպուրական) միակ ծնծղան անվանվում էր դամ, իսկ Ալաշկերտում՝ ըստ Արշակ Սարգսյանի, ձանձաղ: Հոգևոր արարողությունների որոշակի պահերին քնոցը, կրկնակ ծնծղաներն ու միակ ծնծղան միասին հնչում են՝ շար ուժերին երիցս քշելու, փախցնելու նպատակով³³:

Բ. Ծնծղաներին վերագրված հատկությունների երկրորդ խումբը, ի տարբերություն առաջինի, կապվում է նվագարանի հետ և այս դեպքում արդեն նվագարանը, ձայնից անկախ, դառնում է մոգական գործիք, միջոց:

ա) Չարը մեկից հանելու և մյուսին ուղարկելու համար անհրաժեշտ է շարոց թուղթ՝ թուղթ ու գիր, զույգ կիսազնդած ծնծղաների մեջ գցել ու հակառակ ուղղությամբ պտտեցնել (դեպի ձախ), անընդհատ կրկնելով անհրաժեշտ մոգական խոսքերը (վերջիններս ասերգային բնույթի բանաձև-

²⁹ ԴԱՆ, Երևան 1980, Շիրակ 1982:

³⁰ ԴԱՆ, Երևան 1980, Արագածոտն 1985:

³¹ ԴԱՆ, Ուտիք 1985, Շիրակ 1982, Արագածոտն 1985:

³² Նյութը գրանցվել է Ախալցխայի հայկական եկեղեցու քահանա Ռուբեն Սաղոյանից, 1982 թ.: Հստ էջմիածնում ծառայող քահանա Արտակ Սիմոնյանի, պատերազմից հետո էջմիածնում Մաղկազարդի նույն ծեսի ժամանակ ծնծղայի փոխարեն բանալիով փայտին էին խփում՝ երկնային դռներ նմանակելով: Հոգևոր ծիսարանում ծնծղայի տարբեր տիպերի և դրանց կիրառությունների մասին տե՛ս Բառարան սուրբ գրքի:

³³ С. С. Лисицян. Указ. соч. с. 140—142

վերն հն)։ Նման եղանակով կարելի է վատ գիրն ուղարկել չարակամին՝ թուղթ ու գիր անողին³⁴։

բ) Ձարքերին, չար ուժերին ոչնչացնելու համար անհրաժեշտ է կախարդական պարի ընթացքում ծնծղայավոր դափով կամ մեծ ծնծղայով հարվածել չար ոգուն³⁵։

գ) Կապ գցել, կապը քանդել։ հայտնի է, որ հայոց հարսանեկան ծեսում հարազատներն աշալուրջ հետևում են, որ չարակամներից որևէ մեկը փեսային կապ չգցի (կախարդանքով առնականությունից ղրկել) և դրա դեմ զանազան միջոցներ են կիրառվում։ օրինակ, եզմորթեքի ժամանակ բանալին թաթախում են մասցուկի արյան մեջ և կողպեքը կողպում՝ բացելով միայն առաջատ մտնելուց առաջ³⁶։

Ինչպես փեսացուին, այնպես էլ ընդհանրապես տղամարդկանց (երբեմն նաև կանանց) կապ գցելու նպատակով «աղջիկ» կոչվող զանգալաձև կամ կիսագնդաձև ծնծղայի կաշեփոկի օղակն անցկացնում են «մանչ» կոչվող զմբեթաձև ծնծղայի մետաղյա սրածայր բռնակի միջից, պտտում, հանդուցում և մոգական խոսքեր ասում, իսկ կապը քանդելու համար մի երրորդ (մանչ, զմբեթաձև) ծնծղայով քանդում են երևակայական հանգույցը և հարվածում կոկոսի ընկուզի կեղևից պատրաստված ծնծղայով³⁷։ Ամենայն հավանականությամբ սա նմանողական մոգության օրինակ է։

Թեև դարեր շարունակ քրիստոնեական եկեղեցին հալածանքի էր ենթարկում ու պայքարում դյուլթողների, հմայողների, վհուկների, մոգերի ու կախարդների դեմ, սակայն մինչև մեր դարի կեսերին էլ, բանասացների վկայությամբ, Հայաստանի տարբեր շրջաններում կարելի էր հանդիպել նրանց ծպտված հետևորդներին։ Ուստի բոլորովին էլ պատահական չէ, որ նվազարանների միջոցով, հատկապես ծնծղաներով կատարվող մոգական արարողությունների մասին տեղեկություններ հաղորդելիս (Շիրակ, Արագածոտն, Զավախք, Ուտիք), բանասացները նախ խաչակնքում էին, կարծես ներում հայցելով իրենց անմաքուր արարքի համար, ապա դժվարահաճությամբ պատմելով՝ հրաժարվում կոնկրետ անուններ տալուց, բացատրելով, որ չեն ուզում չարչարել հանգուցյալների հոգիներին։ Ուտիքում, օրինակ, ճանաչված գուշակներից մեկը, որ նաև վհուկի համբավ էր վայելում, հավատում էր, որ նման մոգական արարողություններ անողների անունները չի կարելի տալ, քանի որ նրանց տները կապված են այն աշխարհի հետ և անունը տալով կարելի է անզգուշաբար հրավիրել նաև մութ ուժերին։ Սա է հավանաբար նաև պատճառը, որ նվազարաններով կատարվող մոգության տարբեր ձևերի ու դրանց կատարողների մասին այդքան թափափ ու կցկտուր տեղեկություններ են հասել մեզ։

Ծնծղաների զարգանախոշերի (խաչեր, ոճավորված բուսանախոշեր, թեք դժանախոշեր, շրջագծեր) ժողովրդական մեկնաբանությունները ևս նվազարանը կապում են չար ու բարի ուժերի պայքարի, կյանքի փակ շղթայի շրջանի, կյանքի հարատևության, անձրևի ու կայծակի զաղափարների հետ³⁸։ Օրինակ, ծնծղաների ամենատարածված զարդանախոշը՝ շրջանաձև եզրագոտին, համարվում է մոգական շրջան, որն անձեռնմխելի է ու անհասանելի չար ուժերին և միայն կոտրված կամ ճաքած ծնծղան կարող է կորցնել մոգական ուժն ու վնասվել չարից։ Ծաքած ու կոտրված ծնծղաները համարվում են չարի դեմ պայքարում վնասված, հավատում էին, որ ծնծղան իր վրա է վերցրել վտանգը և տիրոջը՝ եկեղեցուն, տունը կամ մարդուն

³⁴ ԴԱՆ, Ուտիք, Արագածոտն, Շիրակ։

³⁵ ԴԱՆ, Ուտիք։

³⁶ Ե. Լ ա ա յ ա ն. Նոր Բայազետի գավառ.—ԱԶ, գիրք 16, Թիֆլիս, 1907, էջ 18։

³⁷ ԴԱՆ, Ուտիք, Զավախք, Շիրակ։

³⁸ ԴԱՆ, Երևան, Շիրակ, Արագածոտն, Ուտիք, Զավախք։

գերծ պահել կամ փրկել շարից: Այսպիսի ծնծղաներին արժանի պատիվ էին տալիս, սրբացնում ու պահում էին մասունքների շարքում³⁹:

Ինչպես արդեն նկատելի է շարադրվածից, հայկական ծնծղաները թե՛ իրենց ձևով (հմմտ. կիսագնդաձև ու գմբեթաձև ծնծղաները զանգերի հետ, թակիչով, հարվածվող ընկուզե և թաթով հարվածվող մետաղե ծնծղաները՝ փայտե, քարե, մետաղե գոնգերի, շամանի թակիչով դափի հետ), թե՛ կառուցվածքով (հմմտ. կենաց ծառի տիպի զիւերը՝ տիեզերական ծառի պատկերով շամանի դափի հետ, որի միջոցով շամանը ճանապարհվում է այն աշխարհ՝ հիվանդի հոգին հետ բերելու) և թե՛ ձայնային հատկանիշներով (շարխափան ուժ), միավորվում են աշխարհի բոլոր ժողովուրդների մոտ տարածված ընդհանուր աղմկային-հարվածային նվագարանների ընտանիքում, ինչպես բոժոժները, շխիկանները, զանգերը, կարկաշանները, կաստանները, քոցները, դափերը, թմբուկները և իրենց հնադույն՝ նախնական իմաստով, ունեն շարխափան նշանակություն:

Մեր օրերում, ցավոք, ծնծղաները դուրս են մղվել ժողովրդի կենցաղից և եկեղեցուց⁴⁰: Մասնագիտացված երաժշտախմբերում՝ սիմֆոնիկ, փողային, կամերային, հնադույն նվագարանների, ծնծղաները դիտվում են արդեն իբրև եվրոպական պրոֆեսիոնալ նվագարաններ և Հայաստանում ևս անվանվում են piatti, ցիմբալ, կիմվալ, կրոնալի, тарелки, մինչդեռ, կարծում ենք ավելի ճիշտ ու բնական կլիներ մեզ մոտ դրանք կոչել հայոց լեզվին հարազատ ու դարերից ավանդված անուններով:

ЦИЦХА: МУЗЫКАЛЬНЫЙ И МАГИЧЕСКИЙ ИНСТРУМЕНТ

Р. В. ПИКИЧЯН

Резюме

Цицха (spela)—распространенный в Армении музыкальный инструмент семейства piatti (тарелок), относящийся к ударно-шумовым. По форме цицха бывают плоскими, полусферическими (подобно колоколу) и куполообразными. Встречаются одинарные и парные. в зависимости от размера—большие, средние и малые цицха. Звук извлекается посредством удара, встряхивания или прикосновения цицха друг к другу. По типу звучания различают цицха, настроенные на определенную высоту, и без настройки (шумовые). Материалом для изготовления цицха мог быть камень, дерево, ореховая скорлупа, кость, медь, бронза, серебро, золото и особые сплавы металлов. Металлические цицха изготавливаются посредством литья, ковки или специальной тепловой обработки скрученной проволоки. Древнейшее цицха, обнаруженное на Армянском нагорье, относится к VII веку до н. э. (Кармир блур). В литературном языке и в разговорных диалектах имеется около двадцати терминов для обозначения цицха соответственно их строению, типу извлечения звука или зву-

³⁹ ԴԱՆ, Երևան, Արագածոտն, Շիրակ:

⁴⁰ Եկեղեցում ծնծղայի կիրառումն այնքան է մոռացվել, որ էջմիածնում, ո՛չ Այրի Տաճարում, ո՛չ Թանգարանում և ո՛չ էլ Գանձատանը մեզ չհաջողվեց ծնծղայի որևէ նմուշ գտնել: Ըստ հոգևորականների բացատրությունների, խորհրդայնացման առաջին տարիներին, երբ սկսվել է հալածանքը կրոնի նկատմամբ, եկեղեցական ողջ սպասքը, այդ թվում նաև ծնծղաները, խլվել են եկեղեցուց և լավագույն դեպքում հանձնվել Թանգարաններին: Սրանով, հավանաբար, պետք է բացատրել, որ Հայաստանի պատմության պետական Թանգարանում են հայտնվել տարբեր վանքերից ու եկեղեցիներից բերված ծնծղաների շուրջ քառասուն նմուշ, որոնց ուսումնասիրությունն էլ մեծապես նպաստեց սույն հոդվածը գրելուն:

чапиту. Цицха нашли многообразное применение в жизненном укладе армянского народа: они используются для подчеркивания ритма музыки, выражения ликования в духовной музыке, и, наконец, являются своеобразным камертоном в церковной музыке. Цицха наряду с церковной утварью также стали священными предметами и как таковые высоко ценились в качестве подношения церкви «для благословения», «во искупление грехов», «во спасение души», «для поминовения», а также использовались на поле брапи или во время охоты, чтобы создать шум и навеять панику. Своеобразное применение нашли цицха также в народных верованиях, различных ритуалах и магических действиях, причем им приписывались особые чудодейственные свойства: считалось, что звуками цицха можно рассеять тьму, изгнать бесов. В таком качестве их применяли при затмении солнца, для облегчения родов или излечения нервных заболеваний. Считалось, что определенные манипуляции цицха различных форм способствуют устранению всевозможных злых наветов и наговоров или развязывают магические узлы, завязанные с намерением лишить жениха мужской силы. Анализ указанных данных, а также сохранившиеся на цицха надписи, узоры и их народные толкования свидетельствуют о том, что армянские цицха своей формой, строением и звуковыми особенностями органично принадлежат к универсальному и широкому классу архаичных ударно-шумовых ритуальных инструментов, куда входят разного рода бубенцы, трещотки, гонги, рипиды, колокола, кастаньеты, шаманские бубны и барабаны. Как и этим инструментам, цицха издревле приписывали значение пресекающего зло чудодейственного талисмана.